

[Augsburg], 26. April 1571

An Theodor Zwinger

UB Basel, Fr. Gr. I 11, fol. 334r.

S. Ego verò, Cl[arissime] D. D[ocor], amice colende, in tuo aere me esse, nunquam negabo. Faxit Deus vt aliquando, vtriusque nostrum commodo, sim soluendo. Oporini Indices vellem retinuisses: quos annis abhinc 10. frustra magnis laboribus cum nostris contuli. Vendendi hic nulla spes est, etiamsi plus quam dimidij precij iacturam faceremus. De Theatro magnam habeo gratiam. abundè est te tantos exantlasse labores. Ego ipse emam à bibliopolis nostratibus. absit vt, praeter tot labores et molestias, quas mea causa caepisti, sumptui tibi sim. De Weitmoseris vide quid statuas. Fortunas eorum audio esse afflictas. Talibus autem temporibus literata munera parum grata esse solent. Sed si omnino mittendum censueris: dabo operam vt per Roseblatum, compatrem meum, illis reddatur. Gnomologiam Isocraticam Oporiniani frigidè sanè καὶ ἀκκιζόμενοι a me petunt ad Cal[endas] graecas excudendam: posteaquam eam Episcopio nostro addixi. ἐργοδιώκτης eris, vt sub autumnum vnà cum Demosthene edatur. Hoc enim rationes meae, vt fiat, et postulant et flagitant. Magnam enim, vt in re tenui, hoc anno pecuniolae iacturam feci: conductis etiam aedibus, in quibus auditores meos, cum valetudo me domi detinet, docere possim: quarum ἔνοίκιον est 50 f. Vale, et, si quid me voles, pro tuo iure impera. 26 Aprilis 1571.

Hiero[nymus] Wolfius  
Tuus.